

## Feierwehr-, Kerwei- und Sportfesch in Billed

Schun zwaa Wuche vor em Fesch verkinde die Stroballe-Phuppe in der Dorfmitt, dass in Billed wieder mol was los sin werd. Un wies dann soweit war, han alli Dorfleit un Gäscht vun nah un fern nor staune kenne: Drei Feschte zugleich an eem enziche Wucheend!

Anfang han die Feierlicheite mit em Jubiläum 90 Jahr freiwillichi Feuerwehr in Billed. Derbei war e Feuerwehrausstellung zu gsiehn, die hiesiche Feuerwehrmänner un e Gaschtgruppe vun Feuerwehrlait aus Menzingen Kraichtal/Deutschland sin mit Blechmusik dorchs Dorf maschiert un han ufm Feuerwehrraal fescht es Tanzbeen gschwung.

Zur Billeder Feuerwehr: In de Jahre 1920-1930 war in villi Banater Ortschaften, so ach in Billed, Dreschtemnebrand an der Tagesordnung. Die Dampfkessel, die mer zum Betreibe der Dreschgarniture gebraucht hat, sin mit Stroh gheizt wore un han oft Glut gspautzt, Strohschowe han Feier gfang. Bei windichem Wetter hat des Feier sich schnell ausgebreit, Baurehef un sogar Dorfviertel ware bedroht abzubrenne. Während der Dreschzeit hat im Billeder Gemeindehaushof immer e Pherdgschpann bereit gestann, um im Ernstfall die Spritz ausm Spritzehaus an die Brandstätte zu ziehe. Doch weil des alles zu vill Umständ gemacht hat un oft vergebens war, is dann im Jahr 1927 die freiwillichi Feuerwehr gegrind gin.

Während am zweite Tach die Jugendliche (Billeder Heiderose, Warjascher Spatze, Edelweiß Detta un Hatzfelder Pipatsche) dorch die Gemeinde maschiert sin un Kerwei gfeiert han, is ufm Sportplatz Handballe gspilt gin. Natierlich kenne sich villi vun eich dran erinnere, dass in Billed, wie in anri Banater Ortschaften, Handball-Spille Tradition war un dass in Billed oftmols es Turnier um die Pipatsch-Pokal ausgetraa is wore. E Summer-Handball-Turnier is ach an sellem Sunntach ausgspielt gin.

### Grienfutter-Faschiertes

De Vetter Pheder war vun jeher zwar e aarich gfräßicher, awer niemols e anspruchsvoller oder schnausicher Mann, wann's ums Esse gang is. Er hat fescht ingephackt, immer e gute Apetit an de Tach geleet. Wann er in die Kich ninkumm is, hat er zwar gschnuppert un ausgeruft: "Des schmeckt awer fein heit!", doch wann er noh am Mittachstisch ghuckt hat, war's em eigentlich egal, was es Kathi em vorgsetzt hat. Oftmols hat des Kathi gsaat: "Pheder, heit muss ich wieder die Leeder an dem Teller ansetze!"

Bis uf eemol. Es hat anfang zu zwicke un zu petze. De Maa hat wehgetun, die Lewer is angeschwoll un die Gall hat gspautzt. "Gsiehscht", saats Kathi, "wann mer nie mit Moß hat esse kenne. Bleibt nix anres iwrich Pheder, du muscht Analiesn mache!"

De Pheder hat sich zum Dokter ufgemacht. Un der hat kunschtatiert, dass die doppelte Portione ufheere misse, dass nor noch mit Eel un ohne Inbrenn gekocht gin derf, dass de Pheder sich meh ans Grienfutter halle soll....

Des war for de starke Mann e aariche Stoß. Er hat umdisponiere misse, es Schweinefleisch is quasi abkumm, Speck un Schungefleisch nix tralla un jede Tach im Summer hats Kathi ihm e großi Salatschissl mit geriewene Gelriewe vorgsetzt. De Pheder hat lamentiert: "Kathi, ich sin hungrich! Koch mer doch endlich mol wieder mei Leibspeis!"

"Ja Pheder, du hascht doch immer alles geere gess. Was is dann dei Leibspeis?"

"Ich han Gusta uf Faschiertes!"

Es Kathi hat em e Grienfutter-Faschiertes gemacht: geriebni Kerbs, gekochti Krumbiere, paar Aijer un Mehl vermisch, alles gut gewerzt un mit Piree dem Pheder vorgsetzt. Der hat kräftich inghau un wie er satt war, ment er: "Kathi, so gutes Faschiertes hascht noch nie gemacht. War des mit Rinds- oder Schweinefleisch?"

"Pheder, do war alles gemischt drin, die Hauptsach awer, es hat der gschmeckt!"